

## A SU CANONIGU CADEDDU

*di Ignazio Cappai*

Cun custu scrittu sinceru  
ddu bollu arregordai,  
po sempri e in benideru  
de bosu ant'a fueddai.

Nascis in terra sinniesa  
de umilis traballantis,  
in tempus de poboresa  
tristu a tirai anantis.

Cun sacrificiu, sudori  
in domu t'hant studiaiu,  
cun impegnu e amori  
ti ses beni apricau.

Po serbiri su Signori  
in custa vida terrena,  
oi supportas dolori  
po una dì prus serena.

Ingiriau de bellus floris  
riccus de profumu nanta,  
t'allebiant cun is coloris  
is malis de sa tua planta.

T'ammiru su coraggiu  
sa forza e passienzia,  
su surrisu messaggiu  
de gentilesa e clemenzia.

De cultura ses omini  
riccu, fort'in s'umiltadi,  
has abbrazzau s'Ordini  
cun alta capacidadi.

De dottu predicadori  
ti presentas in s'altari,  
de italianu oradori  
latinu e sardu impari

No ti mancant delicadesa  
poeta, sabiu, scrittori,  
a sa lingua campidanesa  
tui dd'has fattu onori.

Sempri attentu difensori  
de cudd'antigu connotu,  
po fama de connoscidori  
in Sardigna tui ses notu.

Peccau m'has annuddau  
cun su Sacramentu Santu,  
de don Cadeddu battiau  
di essi su primu mi bantu.

Cun sa vesti de candori  
a sa luxi m'has portau,  
ses prelau de valori  
po meritus chi has donau.

Omini riccu de storia  
a cospettu de su Divinu,  
de su tronu de sa Gloria  
illuminasì su camminu.